

## **Bowon Bio Bangow**

Tua' di' ebpung akay kerok naran miro Bowon bio Bangow. Bowon bio Bangow ton geserawo. Jadi da seratu koy Bowon bio Bangow.

Satu maso mepakkot kat iro duo keiy mengallan Balay. Jadi sob eippus balay ino, Bowon bio Bangow da akay balay. Mato edtow ino sangan sudtop. Jadi sob gabpi, turug kat Bowon bio Bangow nong allom balay ino.

Beira' Bowon nong Bangow, "Kemo ikow turug, aro mo kussuy kasu' mo."

Gedawot Bangow nong Bowon, "A'."

Jadi turug kat iro duo koy. Sob turug, pat kat Bangow kussuy kasu' rumo. Jadi gebpa' pa balay Bowon bio Bangow.

Jadi geseragga' kat Bowon bio Bangow. Sakko nong Bowon bio Bangow gulla'.

Beira' Bowon nong Bangow, "Mettang ikow suru pasang. Ino segellun mo, ikow mangan pait. Jadi aku Bowon suru di' tadtik. Ino segellun ku, aku mangan paray."

Jadi ino rumo sebop, sawot edtow ano Bowon mangan paray, sebop rumo guog di' tadtik.